

Месяца июня в 14-й день  
Собору святых Дивеевских

На малей вечерни

На Господи, возвах: стихиры святых на 4, глас 5:

Небо звездами, Владыко, красивый/ и святыми Твоими всю землю просветивый,/ светоносный собор Дивеевских святых явил еси,/ Тебе возлюбивших и всем сердцем взыскавших,/ Твоей же Пречистой Матери послуживших,/ иже не престают милостивно ходатайствовать о нас,/ светолучными сиянии чудотворений озаряюще/ и многоразличных обстояний избавляюще./ Ихже просим: о святии, молитесь о нас,/ чтущих любовь святую память вашу. *(Дважды)*

Множество звезд, Вседержителю, сотворивый/ и тьму ночную тем просвещати повелевый,/ светоявленный лик святых земли Дивеевския/ в Царство славы несказанныя приял еси/ и теплых ходатаев нам даровал еси./ Мы же, благодарни суще, вопием:/ о, угодницы Божии!/ Молитесь о нас прилежно,/ еже усердно Богу угождати,/ веру Православную соблюдать,/ от бед Отечеству нашему избавитися/ и всем, почитающим вас любовью, спастися.

Глас 4:

Преподобне отче Серафиме,/ любовью к Богу распалаяся,/ тленная вся оставил еси/ и избранник возлюблен Божия Матере явился еси,/ о обители же Ея попечение отеческое имея/ и неизреченных таин откровение приемь,/ по благословению и воли Ея вся устроил еси./ О, старче дивный и богомудрый,/ истинный наставниче на путь спасения,/ учителю любви и целомудрия!/ Дивеево дивное тобою ныне славится/ и святая рака твоя обитель сию украшает,/ к нейже, яко к самому тебе припадаем, просяще:/ не забуди нас, радости наша,/ Серафиме, преподобне отче наш.

Слава, глас 2:

Днесь Церковь Русская ликует/ и прославляет собор Дивеевских святых,/ во обители добрыми подвиги/ во всяцем чине и звании подвизавшихся,/ знаемых

купно и незнаемых,/ ихже имена написаша в книзе жизни./ Тех предстательством и покровом Пречистыя Богородицы/ Отечество и обитель нашу в мире сохрани,/ Многомилостиве Христе Боже наш.

**И ныне, Богородичен, глас тойже:**

Все упование мое на Тя возлагаю,/ Мати Божия,/ сохрани мя под кровом Твоим.

**На стиховне стихиры святых, глас 5.**

**Подобен: Преподобне отче:**

Преподобная мати наша Александро!/ Явлением тебе Царицы Небесныя/ Дивеево дивно освятися/ и от Нея четвертым жребием наречеся./ Ты же, многими труды и терпением/ в слезном покаянии основание обители положивши/ и благодать Святаго Духа стяжавши,/ ныне в Небесных чертозах ликуеши/ и молишися о спасении душ наших.

**Стих: Дивен Бог во святых Своих,/ Бог Израилев.**

Преподобная мати наша Марфо!/ Ты, ангелоподобнаго ради жития твоего/ возлюбленная ученица преподобнаго Серафима была еси/ и откровение о грядущей славе Дивеева от него прияла еси,/ моление о еже основати обитель Мельничную с ним совершивши,/ на служение в ней/ Царицею Небесною избрана была еси,/ Юже моли о спасении душ наших.

**Стих: Святым, иже суть на земли Его,/ удиви Господь вся хотения Своя в них.**

Преподобная мати наша Елено!/ Ты отцу своему духовному преподобному Серафиму/ в простоте сердца, яко Христу, повиновалася еси/ и за послушание в юных летех/ вместо брата смерть прияла еси,/ паче бо сея любви никтоже имать,/ да кто душу свою положит за други своя,/ глаголет Господь,/ Егоже моли о спасении душ наших.

**Слава, глас 6:**

Благочестие свое / в прославлении твоём, преподобне отче Серафиме,/ святой царь Николай являет/ и, ты, яко великаго угодника и чудотворца почитая,/

со святою царицею Александрою/ пред мощми твоими усердно молится:/ да  
Господь благодать Свою низпослет на Русь Святую,/ даруя ей велию милость.

**И ныне, Богородичен, глас тойже: Творец и Избавитель:**

**Тропарь писан на велицей вечерни.**

**На велицей вечерни**

**Блажен муж: 1-й антифон. На Господи, возвах: стихиры на 8, глас 1.**

**Подобен: О, дивное чудо:**

**О, дивное чудо!/ Всенепорочная Мати Света,/ избравши в жребий Свой  
обитель Дивеевскую,/ благая обетования о ней изрече,/ благословение Божие и  
милость Свою являющи,/ да любовь Ей благодарственно воспеваем:/  
Благодатная, радуйся,/ с Тобою Господь,/ подай миру Тобою велию милость.**

**Дивны Твоя тайны, Богородице,/ по слову неложного обетования/ обитель  
Твою присно посещаеши,/ божественными сиянии ангельских воинств  
обступаема/ и чины всех святых земли Дивеевския прославляема,/ с нимиже Тебе  
любвию воспеваем:/ Благодатная, радуйся,/ с Тобою Господь,/ подай миру  
Тобою велию милость.**

**О, дивное чудо!/ Благословенная обитель Дивеевская/ четвертый удел  
Божия Матере нарицается,/ в нейже сонм святых бывает/ и земли Русской славу  
велию являет./ Мы же, к ним припадающе, тепле вопием:/ о, угодницы  
всехвальнии,/ Господеви молитесь/ даровати душам нашим мир и велию милость.**

**Глас 2.**

**Подобен: Киими похвальными венцы:**

**Киими похвальными добротами/ ублажим преподобнаго Серафима?/  
Повелений Царицы Небесныя вернаго исполнителя,/ Дивеевския обители  
устроителя и попечителя/ и сестер ея отца чадолюбиваго и духовнаго  
окормителя,/ всем помощника скорого и в скорбех утешителя,/ и молитвенника  
теплаго о душах наших.**

**Киими вдохновенными песньми/ воспоим преподобныя жены Дивеевския?/  
Александрю, Божия Матере избранницу/ и обители нашея первоначальницу:/**

Марфу, отроковицу ангелоподобную,/ преподобнаго Серафима сотаинницу:/ Елену, кротость и смирение возлюбльшую/ и в самой смерти истинное послушание явльшую./ Ихже имамы молитвенницы теплыя о душах наших.

Киими похвальными словесы/ возвеличим Пелагию, Параскеву и Марию блаженныя?/ Ко Господу вкупе духом горящия,/ странницы земныя Отечества горняго взыскующия,/ причастницы звания небеснаго,/ миру юродивыя, обаче во Христе мудрыя./ Ихже имамы молитвенницы теплыя о душах наших.

Киими достойными венцы/ увенчаим священномученики добропобедныя?/ Серафима, летописца обители Дивеевския/ и града святаго Петра архипастыря многострадальнаго,/ Иакова и Михаила, иереи благоговейныя/ и сестер Дивеевских попечители духовныя,/ новозакланная агнцы, за Христа пострадавшия./ Ихже имамы молитвенники теплыя о душах наших.

Кия неизреченныя дары/ принесем по достоянию/ новомученицам и исповедницам Дивеевским?/ Марфе и Пелагии, инокинем честным и агницам Христовым,/ Матроне преподобней, исповеднице твердейшей,/ мученицам Евдокии, Дарии, Дарии и Марии,/ первым христианом во страдании подобницам,/ верным ученицам Господним./ Ихже имамы молитвенницы теплыя о душах наших.

#### Слава, глас 4:

Днесь наста солнца светлейший праздник/ собора святых Дивеевских,/ иже верныя к веселию созывает/ и лучами радости всех просвещает,/ дивными сияя чудесы:/ в них бо явися слава Христова,/ слава Церкви Русския./ Темже, вернии, вопием любовию:/ молитесь за ны ко Господу,/ вси святии земли нашея,/ помиловатися душам нашим.

**И ныне, Богородичен, глас тойже:** Иже Тебе ради богоотец пророк Давид:

**Вход. Прокимен дне. И чтения три.**

**Пророчества Исаиина чтение (глава 43):**

Также глаголет Господь:/ вси языцы собращася вкупе/ и соберутся князи от них,/ кто возвестит сия в них?/ Или, яже от начала, кто слышана сотворит вам?/ Да приведут свидетели своя и оправдятся,/ и да услышат, и да рекут истину./

Будите Ми свидетели,/ и Аз Свидетель, глаголет Господь Бог,/ и Отрок, Егоже избрах,/ да познаете и веруете Ми, и разумеете, яко Аз есмь;/ прежде Мене не бысть ин бог и по Мне не будет./ Аз есмь Бог, и несть, разве Мене, спасаяй./ Аз возвестих и спасох, уничижих, и не бе в вас чуждий./ Вы Мне свидетели, и Аз Господь Бог./ И еще от начала Аз есмь,/ и несть от рук Моих избавляяй;/ сотворю, и кто отвратит то?/ Сице глаголет Господь Бог,/ избавляяй вас Святыи Израилев.

### Премудрости Соломоновы чтение (глава 3):

Праведных души в руце Божией/ и не прикоснется их мука./ Непщевани быша во очесех безумных умрети,/ и вменися озлобление исход их,/ и еже от нас шествие – сокрушение,/ они же суть в мире./ Ибо пред лицом человеческим, аще и муку примут,/ упование их безсмертия исполнено./ И, в мале наказани бывше, великими благодетельствовани будут,/ яко Бог искуси я и обрете их достойны Себе./ Яко злато в горниле, искуси их/ и, яко всеплодие жертвенное, прият я./ И во время посещения их возсияют/ и, яко искры по стеблию, потекут./ Судят языком и обладают людьми,/ и воцарится Господь в них во веки./ Надеющиися Нань разумеют истину/ и вернии в любви пребудут Ему,/ яко благодать и милость в преподобных Его/ и посещение во избранных Его.

### Премудрости Соломоновы чтение (главы 5 и 6):

Праведницы во веки живут, и в Господе мзда их,/ и попечение их у Вышняго./ Сего ради примут Царствие благолепия/ и венец доброты от руки Господни,/ зане десницею покрывает я и мышцею защитит их./ Приимет всеоружие рвение свое/ и вооружит тварь в месть врагом./ Облечется в броня правды/ и возложит шлем – суд нелицемерен./ Приимет щит непобедимый – преподобие,/ поострит же напрасный гнев во оружие,/ споборет же с ним мир на безумныя./ Пойдут праволучныя стрелы молниины/ и, яко от благокругла лука облаков, на намерение полетят,/ и от каменометныя ярости исполнь падут грады./ Вознегодует на них вода морская,/ реки же потопят я нагло./ Сопротив станет им дух силы/ и, яко вихрь, развеет их,/ и опустошит всю землю беззаконие,/ и злодейство превратит престолы сильных./ Слышите убо, царие, и разумеите,/

навыкните, судии, концев земли./ Внушите, держащие множества/ и гордящиеся о народех язык./ яко дана есть от Господа держава вам/ и сила от Вышняго.

**На литии стихира храма, таже святых, глас 1:**

Блаженна еси, чудная обитель Дивеевская,/ славны вся пределы твоя,/ стопами Пресвятыя Богородицы освященныя/ и подвиги святых прославленныя,/ ихже всехвальную память совершающе,/ славословим Христа Бога, дивнаго во святых Своих,/ Емуже молимся спастися душам нашим.

**Слава, глас тойже:**

Небесных благ струи нетленныя,/ цельбам сущия источник приснотекущий,/ священная ваша мощи, о святии Дивеевские,/ сиянием бо Святаго Духа осеняемая,/ благоухают и душетленных страстей исцеляют/ и напаяют сердца верных благодатию Божественною.

**И ныне, Богородичен, глас тойже:**

Всякое дыхание и тварь/ похваление Тебе приносит, Владычице:/ и инокини Дивеевския, заповедь преподобнаго Серафима хранящия,/ пред иконою святаго Умиления Твоего пение молебное возсылают:/ Пресвятая Богородице, спаси нас!

**На стиховне стихиры, глас 2.**

**Подобен: Егда от Древа:**

Егда, яко звезды, светом добродетелей сияющия,/ озарили есте блистанием чудес вси концы Русския земли,/ преподобныя матери наша Александро, Марфо и Елено,/ Царице Небесней верно послужившия,/ тогда место подвигов ваших показали есте небо другое./ Ныне же память ваша согревает верных сердца,/ усердно молящих вас:/ помяните нас, святые матери наша/ у Престола Божия во Царствии Небеснем.

**Стих:** Дивен Бог во святых Своих,/ Бог Израилев.

Егда, яко злато, в печи искушений сияющия,/ святые блаженные матери наша Пелагие, Параскево и Марие,/ шествовали есте тесным путем,/ отвергшая себе и крест на рамо взявша,/ тогда светом божественныя мудрости просвещаемыя,/ велия подвиги и постныя труды понесли есте./ И кто исповесть

смирение, незлобие, терпение ваше?/ Помяните чад своих, зовущих вам любовь:/ радуйтесь, наша теплая предстательницы и покровительницы.

**Стих:** Святым, иже суть на земли Его,/ удиви Господь вся хотения Своя в них.

Приидите, вернии, согласно восхвалим/ Церкви Христовы непоколебимое утверждение,/ Царицы Небесныя славное ополчение:/ мученика священна и святителя всечестна Серафима,/ двоицу иереев Михаила и Иакова,/ священную похвалу пастырей истинных,/ жертвенник красен свое сердце сотворивших/ и священную ризу кровьюми обагривших./ Ихже ради страданий, Всесильне Спасе, помилуй нас.

**Слава, глас 8:**

О, преславнаго чудесе!/ Стопам последующе древних мученик/ твердым веры исповеданием,/ гонений и страданий крепким терпением,/ преподобномученицы Пелагия, Марфа/ и преподобноисповедница Матрона,/ светом крестных лучей осияваемыя,/ венцем победы благославно увенчашася./ Ихже ради подвигов, Всесильне Спасе, помилуй нас.

**И ныне, Богородичен, глас тойже:**

Владычице, прими молитвы раб Твоих,/ и избави нас/ от всякия нужды и печали.

**Тропарь, глас 5:**

Днесь церковная расширяются недра,/ приемлюще богатство Божия благодати,/ и радуется Пресвятая Богородицы избранная обитель,/ память совершающи многоименитаго лика святых Дивеевских,/ в Небесном Царствии торжествующих/ и молящихся о душах наших.

**На утрени**

**По 1-м стихословии седален, глас 4:**

Днесь, яко солнце незаходимое,/ возсия всечестная память собора святых, в земли Дивеевской просиявших,/ равноангельным житием и мученическою

смертию Богу угодивших/ и дерзновение велие у Него стяжавших./ Ихже молитвами, Боже, даруй нам велию милость.

**Слава, и ныне, Богородичен:**

**В** храме Рождества Твоего, Пресвятая Богородице, идеже мощи святых почивают,/ немолчное славословие Господу возносится/ и сим непрестанным псалмопением обитель Дивеевская укрепляется.

**По 2-м стихословии седален, глас 6:**

**Д**несь светло красуется обитель Дивеевская/ и чада Церкви Христовы радуются,/ прославляюще собор святых, в земли сей просиявших,/ и ревностию ко спасению просвещаются, взывающе:/ тех молитвами, Господи, спаси души наша.

**Слава, и ныне, Богородичен:**

**Е**гда в день празднования Пресвятаго Рождества Твоего, Владычице,/ обитель Дивеевская вестью скорбною огласися о грядущем разорении ея,/ тогда под Свой омофор инокинь честных взяла еси, Пречистая,/ скорая в бедах Помощнице.

**Величание:**

**В**еличаем вас,/ вси святии земли Дивеевския,/ и чтим святую память вашу,/ вы бо молите о нас/ Христа Бога нашего.

**Псалом избранный:**

**Г**осподи, Господь наш,/ яко чудно Имя Твое по всей земли.

**М**не же зело честни быша/ друзи Твои, Боже.

**И**зочту их,/ и паче песка умножатся.

**Д**ивен Бог во святых Своих,/ Бог Израилев.

**С**вятым, иже суть на земли Его,/ удиви Господь вся хотения Своя в них.

**Б**лажени вси боящиеся Господа,/ ходящие в путех Его.

**В**осхвалятся преподобнии во славе,/ и возрадуются на ложах своих.

**В**оспойте Господеву песнь нову,/ хваление Его в Церкви преподобных.

**С**оберите Ему преподобныя Его,/ завещающия завет Его о жертвах.

**В**еселитесь о Господе/ и радуйтеся праведнии.

**П**раведницы наследят землю/ и вселятся в век века на ней.



Многи скорби праведным,/ и от всех их избавит я Господь.

Милость же Господня от века и до века/ на боящихся Его.

И правда Его на сынех сынов, хранящих завет Его/ и помнящих заповеди Его творити я.

От восток солнца до запад/ хвально Имя Господне.

По полиелеи седален, глас 4:

О, сродницы наши и теплии заступницы,/ иже в земли Дивеевской прославльшиися:/ священномученицы, преподобнии, мученицы, исповедницы и блаженнии,/ подвиги своими Богу угодившии/ и нетленные славы венцы украсившиися,/ Христа Бога нашего молите/ мир Церкви даровати/ и душам нашим спастися.

Слава, и ныне, Богородичен:

Многими содержими напастьми,/ во всяцей скорби душевной и обстоянии к Тебе прибегаем, Пресвятая Богородице,/ молебное пение по заповеди преподобнаго Серафима приносяще:/ о, Мати Слова и Дево,/ от тяжких и лютых нас спаси!

Степенна, 1-й антифон 4-го гласа. Прокимен, глас 4: Дивен Бог во святых Своих,/ Бог Израилев. Стих: В церквах благословите Бога, Господа от источник Израилевых. Всякое дыхание: Евангелие от Матфея, зачало 11.

По 50-м псалме стихира, глас 6:

Церкве Христовы светильницы,/ всея Руси украшение,/ святии вси, в земли Дивеевской просиявшии,/ Владыку всех молите/ мир вселенней даровати/ и душам нашим велию милость.

Канон святых, глас 1.

Песнь 1

*Ирмос: Твоя победительная десница,/ боголепно в крепости прославися:/ та бо, Безсмертне,/ яко всемогущая, противныя сотре,/ израильтяном путь глубины новосоделавшая.*

**Припев:** Все святити Дивеевские, молити Бога о нас.

Днесь ликует обитель Дивеевская,/ четвертый удел Царицы Небесныя во вселенней именуемая,/ прославляющи собор святых своих,/ яко звезды пресветлыя, небо церковное украсившия.

Преподобне отче Серафиме!/ Ты, попечение о обители Дивеевской/ из уст преподобныя Александры, яко завет духовный, восприем,/ во вся дни живота твоего сию окормлял еси./ И ныне, святыми мощами zde почивая,/ обета своего не нарушил еси.

Священномучениче святителю Серафиме!/ Ты, на место подвигов Саровскаго Чудотворца пришед,/ любовью к нему возгорелся еси/ и, благословение блаженныя Параскевы улучив,/ многоценную летопись обители Дивеевския составил еси.

Чудотворцу Саровскому тезоимените, святителю Серафиме!/ Ты, мученическая кончины предречение от него прием,/ утешения в видении от того сподобился еси./ Ныне же во Царствии Небеснем вкупе с ним пребываеши/ и молишися о душах наших.

**Богородичен:** Радуйся, Пресвятая Госпоже, Твоим посещением Дивеево освятившая,/ радуйся, благочестие тамо насадившая,/ радуйся, монашествующих zde множество собравшая.

### Песнь 3

*Ирмос: Едине ведый человеческого существа немощь,/ и милостивно в не вообрази,/ препояши мя с высоты силою,/ еже вопити Тебе, Святый:/ одушевленный храм неизреченныя славы Твоя, Человеколюбче.*

Повеления Царицы Небесныя о жребии Ея сподобльшиися,/ на подвиг послушания ревностне устремилася еси,/ преподобная мати Александро,/ и начало обители Дивеевския положила еси.

Многотрудная подвиги подъемши,/ добродетельми многими украсилася еси, преподобная мати Александро,/ и, храм Казанския иконы Пресвятыя Богородицы во обители устроивши,/ великая святая жена явилася еси.

О, преподобная мати Марфо, великаго ангельскаго образа восприемнице!/ Ты во Царствии Божии со святыми девами предстоиши,/ помяни и нас у Престола Божия.

Свободну себе от обручника земнаго сотворивши,/ со светлою свещею души твоя в сретение Небеснаго Жениха устремилася еси, преподобная Елено,/ Емуже уневестившись,/ в чертог Небесный с мудрыми девами возшла еси.

**Богородичен:** Радуйся, во удел Себе Дивеево избравшая,/ радуйся, Заступницею места сего быти изволившая,/ радуйся, верным, пребывающим во обители, Споручнице вечнаго спасения.

#### Седален, глас 1:

Яко звезды многосветлыя,/ на небе церковнем просиявшии/ и подвигов добропобедных сиянием и чудес зарями/ всю землю Дивеевскую просветившии,/ вы, святии, Божественныя светлости явилися есте причастницы/ и блаженныя жизни вечныя показалися есте наследницы./ Темже, всерадостную память вашу совершающе, верно вопием:/ молите Христа Бога грехов оставление даровати/ любовьию вас почитающим.

#### Слава, и ныне, Богородичен:

Благословение на четвертый Твой удел,/ яко Иверии, Афону и граду Киеву излиля еси, Царице Небесная,/ и до днесь благодать Всесвятаго Духа Божия/ и обилие благ Небесных и земных/ от места Твоего возлюбленнаго/ по слову Твоему не оскудевают.

#### Песнь 4

*Ирмос:* Гору Тя, благодатию Божиею приосененную,/ прозорливьма Аввакум усмотрев очима,/ из Тебе изыти Израилеву провозглашаше Святому,/ во спасение наше и обновление.

Иже любит отца или мать, сына или дочь паче Мене,/ несть Мене достоин, рече Господь,/ и иже не примет креста своего, несть Мене достоин./ Ты

же, блаженная мати Пелагие,/ вся домашняя своя оставльши, Господу твоему последовала еси/ и душу свою в живот вечный соблюла еси.

**И**хже око не виде, и ухо не слыша, и на сердце человеку не взыдоша, уготова Бог любящим Его./ Ты же, блаженная мати Параскево,/ вся сия сокровища высия мудрости духовныя/ безумием Христа ради познала еси.

**С**е есть живот вечный, да познаем Господа,/ не разумети бо Того смерть есть./ Ты же, блаженная мати Марие,/ Бога, яко Источника жизни, познавши и возлюбивши,/ еще в жизни сей в сердце твоём Царствие Небесное обрела еси.

**Д**ивен Бог во святых Своих,/ Иже тленная в нетление прелагаяй/ и мертвенная в бессмертие облакаяй./ Той и ваша святая мощи, блаженные матери наша Пелагие, Параскево и Марие,/ яко многоценное сокровище, в земли сокровенное, яви нам,/ во образ грядущаго всеобщаго воскресения.

**Богородичен:** Радуйся, теплая Ходатаице о живущих в четвертом жребии Твоем;/ радуйся, милость Сына Твоего до скончания века месту сему обещающая;/ радуйся, Радосте и Спасение душ наших.

## Песнь 5

**Ирмос:** *Просветивый сиянием/ пришествия Твоего, Христе,/ и осветивый Крестом Твоим мира концы,/ сердца просвети светом Твоего богоразумия,/ православно поющих Тя.*

**Я**ко злато в горниле, Бог искуси тя/ и обрете достойну Себе, преподобномученице Марфо честная,/ и, яко всеплодие жертвенное, прият тя./ Ибо пред лицом человеческим, аще и муку прияла еси,/ упование твое бессмертия исполнено/ и, в мале наказана бывши,/ великими дары благодетельствована еси на Небесех.

**Т**елом умерщвлена была еси, преподобномученице Пелагие,/ мучение смертное от рук богоборцев приемши,/ обаче духом низложила еси демонов немощныя дерзости/ и во страдании своем венец нетленный прияла еси/ от Христа Бога нашего.

**И**же, аще исповесть Сына Божия пред человеки на земли,/ того и Господь на Небеси исповесть пред ангелы Своими./ Ты же, преподобная Матроно

исповеднице,/ добрым подвигом веры подвизавшись,/ исповедание твердое пред мучители явила еси.

**Преподобномученицы Марфо, Пелагие/ и исповеднице славная Матроно,/ подвиги вашими Церковь украсися,/ несть бо мужеский пол, ни женский,/ но всяческая и во всех Христос Бог,/ богат Сый во всех призывающих Его.**

**Богородичен:** Радуйся, Хранительнице наша в настоящем веце;/ радуйся, Предстательнице и непостыдное упование в будущем;/ радуйся, всякое зло от жребия Своего отражающая.

### Песнь 6

**Ирмос:** *Обыде нас последняя бездна,/ несть избавляяй,/ вменихомся, яко овцы заколения./ Спаси люди Твоя, Боже наш:/ Ты бо крепость немощствующих и исправление.*

**Обители Суждальския настоятельство приим,/ житие преподобного Евфимия составил еси, священномучениче Серафиме./ Егда же Господь к святительству тя призва,/ Церкви Русской послужил еси/ и архипастырь добр явился еси.**

**Прехвальне священномучениче Михаиле,/ Архистратигу Небесных Сил тезоимените!/ Кто яко Бог – взывал еси пред богоборцы,/ Архангела подражав дерзновению.**

**Отрасле пречестная корене благочестиваго, священномучениче Михаиле,/ священным стопам отца твоего последовав,/ верности Богу и благочестию того поревновал еси/ и тождестрадальник единокровнаго брата твоего явился еси,/ с нимже молися о спасении душ наших.**

**Любовию к чину монашескому преисполненный,/ дом свой обитель для сестер, в изгнании сущих, сотворил еси, священномучениче Иакове,/ Авраамле страннолюбие показуя/ и Иаковле многочадие духовне приемля,/ сего ради мзда сих праотец на Небесех тебе даровася.**

**Богородичен:** Радуйся, Благодатная, яко наследие Твое присно назираеши;/ радуйся, яко благодати и милости Своя нас сподобляеши;/ радуйся, благословение Сына Твоего на нас низводящая.

### Кондак, глас 8:

Сосуды Духа Святаго явистеся честным вашим житием,/ усерднии служителие Пресвятыя Богородицы,/ в земли Дивеевской просиявшии,/ помяните нас у Престола Божия во Царствии Небеснем.

### Икос:

Аз есмь Лоза, вы же рождие,/ рече Христос Бог Своим учеником./ Такжеже и вы, святии земли Дивеевския,/ явистеся в вертограде Небеснем рождие лозы Христовы,/ благоукрасивше Святую Церковь Русскую плоды веры и благочестия,/ помяните нас у Престола Божия во Царствии Небеснем.

### Песнь 7

*Ирмос: Авраамстии отроцы в пеци Троицу прообразивше,/ огненный пламень на росу преложшиша/ и, поюще, вопияху:/ благословен еси, Боже отец наших.*

Тезоименная благоволению Божию сущи, мученице Евдокие блаженная,/ николиже попечения по заповеди Спасителя имела еси,/ что ясти, что пити или во что облещися,/ взыскала бо еси прежде Царствия Божия и правды его,/ и сего ради вся потребная прияла еси от Господа Бога отец наших.

Тезоименно нареченная, страстотерпицы Дарие и ина Дарие Пузовския,/ во едином возрасте мученическую смерть прияли есте,/ немощни бо сущия плотию,/ сильни духом Богу явистеся, воспевающия:/ благословен еси, Боже отец наших.

Святителя Николая предстательством исцеление от недуга получивши, мученице Марие,/ блаженной Евдокии до конца жизни своя послужила еси, Господеву воспевающи:/ благословен еси, Боже отец наших.

Тридневная избиения и смерть лютую претерпевшая,/ славная мученицы Пузовския,/ стопам Христа последовали есте, взывающа:/ Тебе ради, Женише наш, ищуща, страдальчествуем,/ страждем и умираем за Тя,/ да и живем с Тобою, Боже отец наших.

**Богородичен:** Радуйся, всяких даров рабом Твоим Всещедрая Подательнице;/ радуйся, во бранех, болезнях и трудех премилосердая Утешительнице;/ радуйся, Надеждо и Спасение душ наших.

## Песнь 8

*Ирмос: В пещи отроцы Израилевы,/ якоже в горниле,/ добротою благочестия чистее злата блещахуся, глаголюще:/ благословите, вся дела Господня, Господа/ и превозносите во вся веки.*

Нищелюбива, сирот и вдовиц питательница была еси, мати наша Александро,/ милостыню же ти тайно творящей,/ воздал есть тебе яже Отец наш Небесный,/ Сущий над всеми Царь во вся веки.

О, велия послушания твоего, мати наша Марфо!/ Ты и по смерти, яко и жива сущи,/ моления наша слышиши./ Темже истину, отцы реченную, яко сия добродетель не умирает,/ утверждаеши во вся веки.

О, мати наша Елено!/ Терпению, смирению, кротости, чистоте и простоте голубиной/ преподобный Серафим тя научи,/ сими же добродетельми к Вечней Жизни себе приуготовивши,/ ныне Бога воспеваеши во вся веки.

**Троицен:** Знаменася благоволение Святыя Троицы/ явлением триех голубей над крестом храма парящих в час освящения его./ Мы же, чудо сие поминающе, воспеваем:/ Троице Святая, слава Тебе.

**Богородичен:** Песни благодарственныя приносим Ти, Мати Божия:/ радуйся, яко спасаеши нас присно от всякаго обстояния;/ радуйся, яко питаеши, устрояеши и о нас промышляеши;/ радуйся, яко и по кончине нашей Небеснаго Царствия сподобляеши.

## Песнь 9

*Ирмос: Образ чистаго Рождества Твоего/ огнепалимая купина показа неопальная;/ и ныне на нас напастей/ свирепеющую угасити, молимся, пещь,/ да Тя, Богородице,/ непрестанно величаем.*

Преславнии священномученицы Серафиме, Михаиле и Иакове!/ Вы честною кровию своею/ ризы священныя обагрили есте/ и древняго запинателя мужественне низложили есте.

Преподобномученицы Пелагие и Марфо славныя!/ Вы, на невидимая воздаяния взирающа,/ смерти Христа ради безбоязненно себе предали есте,/ рекша в сердце своем:/ видимая временна суть,/ невидимая же вечна.

Преподобная мати наша Матроно!/ Ты, постническим житием подвизавшись,/ исповеданием твердым украсилася еси/ и, заточения и горькия работы подъемши,/ многия скорби и беды Христа ради претерпела еси,/ сего ради на Небесех мзду трудов твоих обрела еси.

Блаженныя матери Пелагие, Параскево и Марие!/ Вы, ко Господу духом горяща,/ странницы земныя, Отечества Горняго взыскующия,/ во обители Дивеевской явились есте/ преподобнаго Серафима достойныя ученицы бывшия.

**Богородичен:** О, Дево Пречистая,/ по глаголу Твоему обитель Дивеевская утвердися и прославися,/ и множеством спасающихся наполнися./ В ней же и сонм святых просия,/ иже молятся о спасении душ наших.

**Светилен, глас 5:**

Радуйся, земле Дивеевская славная,/ Небесныя заступники имущи, вся святая, в тебе просиявшия./ Днесь светло праздник тех совершающе,/ собор их достойно в песнях почитаем.

**Слава, и ныне, Богородичен:**

О, Пречистая Дево! Игуменья обители Дивеевския обещалася еси присно быти/ и Господу zde служащих, яко звезды небесныя и песок морской, умножити./ Сего ради Тя, Приснодево, яко Матерь Света и Сына Твоего/ песньми величаем.

**На хвалитех стихиры, глас 5.**

**Подобен:** Радуйся, Живоносный Кресте:

Радуйся, обитель Дивеевская,/ из тебе бо произыде дивный лик святых,/ в различная лета многия подвиги понесших/ и соблазны мира невозвратно отвергших,/ Единому же Господу послуживших/ и заповеди Его свято соблюдавших./ К нимже с верою и любовию возопиим:/ радуйтесь, обители нашея честный покрове и заступление,/ приснии молитвенницы о спасении душ наших.

Радуйся, обитель Дивеевская,/ собор святых в себе воспитавшая,/ тии бо, нищетою духовною обогатившеся,/ плачуще, благодати Утешителя исполнишася,/ кротции же суще, Царствие Небесное наследоваша/ и, алчуще и жаждуще правды Божия, насытишася,/ милостию же украшенни, помиловани быша/ и, яко чистии сердцем, Святую Троицу узреша./ К нимже с верою и любовию возопиим:/



радуйтесь, обители наша честный покрове и заступление,/ приснии молитвенницы о спасении душ наших.

Радуйся, обитель Дивеевская,/ чада бо твоя, Живоносного Креста благодатию укрепляеми,/ верность и любовь ко Христу распятому сохраниша,/ страдания же многообразная доблественно претерпевше,/ яко воины неборимии, венцы нетленные восприяша/ и, правды ради изгнани и мучими,/ вечную славу уллучиша./ К нимже с верою и любовию возопиим:/ радуйтесь, обители наша честный покрове и заступление,/ приснии молитвенницы о спасении душ наших.

Радуйтеся, святии собора Дивеевскаго,/ красный плод подвигов ваших Христу Богу принесшии./ Радуйтеся, яко красотою любве сердца ваша украсивше,/ долготерпению и мужеству верных научаете./ Радуйтеся, яко, Престолу Вседержителя во славе предстояще,/ предстательством вашим присно о нас ходатайствуете./ Радуйтеся, обители наша честный покрове и заступление,/ приснии молитвенницы о спасении душ наших.

#### Слава, глас 2:

Красуйся ныне, Дивеевская земле,/ принесшая Богу угодники святыя:/ священномученики славныя,/ пастырем украшение,/ преподобныя отцы и матери,/ ангелом сожители,/ новомученицы и исповедницы,/ мучеников слава и похвала,/ блаженныя и юродивыя,/ цвет благоуханный незлобивым./ Ихже молитвами,/ Христе Боже, помилуй нас.

#### И ныне, Богородичен, глас тойже:

Все упование мое на Тя возлагаю,/ Мати Божия,/ сохрани мя под кровом Твоим.

#### На Литургии

Блаженны от канона святых, песни 3-я и 6-я на 8. Прокимен, глас 4: Дивен Бог во святых Своих,/ Бог Израилев. Стих: В церквах благословите Бога, Господа от источник Израилевых. Апостол ко Евреям, зачало 330. Конец: Взирающе на Начальника веры, и Совершителя Иисуса. Аллилуиа, глас 4: Воззваша праведнии, и Господь услыша их, и от всех скорбей их избави их. Стих: Многи скорби

праведным, и от всех их избавит я Господь. **Евангелие от Матфея, зачало 11.**

**Причастен:** Радуйтесь, праведнии, о Господе, правым подобает похвала.

### **Молитва**

**О,** всечестнии святии Дивеевские, избранницы Царицы Небесныя, приснии Ея послушницы, подвиги своими в Царствие Небесное возшедшии!

Се ныне в день общаго вашего торжества приносим вам сие хвалебное пение, ублажаем святое житие, прославляем великая чудеса, восхваляем любовь и величаем подвиги ваша. Вы бо, прелести мира сего отвергшися и взявше крест свой, усердно последовали есте Христу, таже и, плоть свою распинающе со страстьми и похотьми, терпением и мужеством до конца врага низложили есте и, премудрость века сего посрамивше, разум Христов стяжали есте.

Сего ради молим вас: о, святии сродницы наши! Не оставите нас, чад ваших духовных, споспешествуйте нам веру Православную твердо содержать, да спасительное семя не изсушено будет зноем неверия, но плод обильный принесет, яко да и мы в будущем веце вкупе с вами услышим блаженный глас Господа и Бога нашего: приидите, благословеннии Отца Моего, наследуйте уготованное вам Царствие от сложения мира. Аминь.